



Fjarðabyggð  
Hafnargötu 2  
730 Reyðarfjörður

UMHVERFIS- OG  
AUÐLINDARÁÐUNEYTIÐ

Skuggasundi 1 101 Reykjavík  
sími: 545 8600 postur@uar.is  
umhverfisraduneyti.is

Reykjavík 17. janúar 2019  
Tilv.: UMH18110129/43-0

Ráðuneytið hefur staðfest og sent til birtingar í B-deild Stjórnartíðinda meðfylgjandi samþykkt um fiðurfé utan skipulagðra landbúnaðarsvæða, skv. 59. gr. laga nr. 7/1998 um hollustuhætti og mengunarvarnir.

Framangreint tilkynnist hér með.

Fyrir hönd ráðherra

Steinunn Elna Eyjólfsdóttir

Afrit:  
Umhverfisstofnun  
Heilbrigðisnefnd Austurlands

Móttekið þann

22. JAN. 2019

 FJARÐABYGGÐ

**SAMÞYKKT**  
**um fiðurfé í Fjarðabyggð utan skipulagðra landbúnaðarsvæða.**

1. gr.

*Gildissvið og markmið.*

Samþykkt þessi gildir um fiðurfé í Fjarðabyggð á svæðum öðrum en skipulögðum landbúnaðarsvæðum og skráðum lögbýlum.

Samþykktin er sett til að tryggja öryggi, hollustuhætti, góða umgengni og fullnægjandi mengunarvarnir vegna fiðurfés í Fjarðabyggð.

Fiðurfé er samkvæmt þessari samþykkt allir fuglar af hænsna og andaætt. Jafnframt nær samþykktin yfir dúfnahald.

2. gr.

*Leyfisveitingar og skilyrði.*

Leyfilegt er að halda hænur og endur að hámarki tíu fugla á sömu lóð. Hvað varðar dúfnahald er leyfilegt að halda að hámarki sex dúfur á sömu lóð. Óheimilt er að halda hana og gæsir.

Aður en fuglahald hefst er skylt að sækja um leyfi hjá Fjarðabyggð. Telji eigna-, skipulags- og umhverfisnefnd að skilyrði til að halda fiðurfé séu fyrir hendi getur hún veitt lögráða einstaklingi eða lögaðila leyfi til að halda ákveðinn fjölda fugla á lögheimili sínu til tiltekins tíma.

Skilyrði leyfisveitinga eru:

- a. að tilskilin leyfi byggingar- og skipulagsyfirvalda liggi fyrir nema að skilyrði í g-lið í 2.3.5. gr. í byggingarreglugerð nr. 112/2012 sé uppfyllt,
- b. að umsækjandi hafi ekki gerst brotlegur við lög nr. 55/2013 um velferð dýra,
- c. að fyrir liggi samþykki sameigenda eða leigjenda ef um fjöleignarhús er að ræða. Sama á við ef um er að ræða jörð eða fasteign í óskiptri sameign. Sé umsækjandi leigjandi skal fylgja samþykki leigusala,
- d. að fyrir liggi samþykki íbúa nærliggjandi húseigna í hið minnsta 100 metra radíus frá þeim stað sem halda á fiðurfé og
- e. að gengið sé úr skugga um að hæsnahald eða annað fuglahald hafi ekki verið sérstaklega bannað eða þinglýstar kvaðir séu á húseignum sem koma í veg fyrir að þar sé haldið fiðurfé.

3. gr.

*Aðbúnaður.*

Um almennan aðbúnað og velferð dýra gilda ákvæði laga nr. 55/2013 um velferð dýra og reglugerða sem settar eru samkvæmt þeim.

Á lóðum þar sem veitt er leyfi til þess að vera með fiðurfé þarf að vera hæfilega stór kofi sem rúmar þann fjölda af fuglum sem leyfi er veitt fyrir.

Í kringum fuglakofa skal vera fuglahelt gerði sem er hæfilega stórt fyrir útiveru fuglanna og sem fullnægir náttúrulegum þörfum þeirra samkvæmt þar að lútandi reglugerð nr. 135/2015 um velferð alifugla og reglugerð nr. 80/2016 um velferð gæludýra. Fuglakofi og gerði skulu vera vel innan lóðamarka viðkomandi lóðar, að lágmarki 3 m. Kofi skal vera meindýraheldur og fóður skal geyma í meindýraheldum ílátum. Til að fyrirbyggja að mýs komist í fóður skulu ílát vera í a.m.k. 35 cm hæð frá jörðu og vera u.þ.b. 60 cm djúp.

Aðgengi að vatns- og/eða sandbaði skal vera til staðar fyrir fuglana og fylgja ákvæðum reglugerðar nr. 135/2015 um velferð alifugla.

4. gr.

*Þrif.*

Þrifa skal kofa að lágmarki vikulega.

Skít skal fjarlægja við daglega umhirðu og hann má ekki safnast upp. Hæsnaskít skal farga eða nýta á löglegan hátt. Þegar mokað er út úr húsum skal koma hæsnaskít fyrir í lokuðum umbúðum þannig að hann valdi ekki lyktarmengun. Þegar hæsnaskítur er nýttur sem áburður skal plægja hann niður þannig að hann liggi ekki á yfirborðinu. Ef ekki er unnt að nýta skít skal flytja hann í lokuðum umbúðum á móttökustöð fyrir lífrænan úrgang.

5. gr.

*Myrkvun.*

Til að koma í veg fyrir ónæði vegna hávaða frá fuglunum ber að hafa myrkur hjá þeim frá kl. 21.00 til kl. 7.00 alla daga.

6. gr.

*Ábyrgð.*

Lausaganga fiðurfés er með öllu óheimil og ber eigandi fulla vörsluskyldu. Eigandi fiðurfés er að öllu leyti ábyrgur fyrir sínum fuglum og ber að koma í veg fyrir að dýrin valdi ónæði í umhverfinu, svo sem vegna hávaða, ólyktar og hvers konar óþrifnaðar og ber að sjá til þess að fuglahaldið laði ekki að meindýr.

7. gr.

*Handsömun.*

Sleppi fuglar frá eiganda eða umráðamanni, skal viðkomandi tafarlaust gera ráðstafanir til að handsama þá. Fiðurfé sem er laust, utan girðinga, skal færa í dýrageymslu á vegum sveitarfélagsins. Ef fugla er ekki vitjað innan einnar viku frá handsömun er heimilt að ráðstafa þeim til nýs eiganda eða selja fyrir áföllnum kostnaði. Að öðrum kosti skulu fuglar aflífaðir.

8. gr.

*Kostnaður við handsömun.*

Hafi fugl verið handsamaður er óheimilt að afhenda hann fyrr en að lokinni greiðslu áfallins kostnaðar. Sé eigandi ekki með leyfi til að halda fiðurfé skal afla leyfis og greiða fyrir það áður en afhending á sér stað.

Kostnaður við handsömun, geymslu eða aflífun fiðurfés skal að fullu greiddur af eiganda þess.

9. gr.

*Sjúkdómar.*

Komi upp sjúkdómar eða smithætta sem að mati sóttvarnarlæknis eða yfirdýralæknis geta skapað hættu fyrir heilbrigði manna, ber að hætta fuglahaldi tafarlaust og farga fuglum í samráði við heilbrigðisnefnd.

10. gr.

*Eftirlit.*

Eftirlit með því að ákvæðum samþykktar þessarar sé framfylgt er í höndum Heilbrigðisnefndar Austurlands samkvæmt lögum nr. 7/1998, um hollustuhætti og mengunarvarnir.

Fjarðabyggð fer með framkvæmd samþykktarinnar í umboði heilbrigðisnefndar. Fjarðabyggð getur ráðið dýraeftirlitsmenn eða falið starfsmönnum sínum hlutverk dýraeftirlitsmanna. Dýraeftirlitsmenn starfa undir eftirliti og á ábyrgð heilbrigðisnefndar. Dýraeftirlitsmenn geta leitað aðstoðar heilbrigðisnefndar, Matvælastofnunar og lögreglu yfirvalda við að fjarlægja óleyfisdyr þegar þörf krefur, t.d. ef nauðsynlegt er vegna almannahagsmuna, dýravelferðar eða heilbrigðis- og öryggissjónarmiða.

11. gr.

*Afturköllun leyfis.*

Bæjarstjórn getur afturkallað leyfi til fuglahalds samkvæmt samþykkt þessari ef fuglahaldið veldur ónæði í umhverfinu, leyfishafi hefur gerst brotlegur við lög nr. 55/2013 um velferð dýra eða brotið er gegn samþykkt þessari.

12. gr.

*Þvingunarúrræði.*

Um þvingunarúrræði og viðurlög við brotum gegn ákvæðum samþykktar þessarar fer skv. XVII. og XIX. kafla laga nr. 7/1998 um hollustuhætti og mengunarvarnir.

13. gr.

*Gjaldtaka.*

Bæjarstjórn er heimilt að setja gjaldskrá í samræmi við 59. gr. laga nr. 7/1998, um hollustuhætti og mengunarvarnir, til að standa straum af kostnaði vegna framfylgdar á samþykkt þessari. Í gjaldskrá eru upplýsingar um leyfis- og eftirlitsgjöld og þann kostnað sem leyfishafi skal bera og kann að hljóta af handsömun, fóðrun og hýsingu fuglanna.

Gjöld vegna aðkomu heilbrigðisnefndar greiðast samkvæmt gjaldskrá Heilbrigðiseftirlits Austurlands.

14. gr.

*Úrskurðarnefnd.*

Um kærueimildir til úrskurðarnefndar umhverfis- og auðlindamála vegna samþykktar þessarar fer skv. 65. gr. laga nr. 7/1998, um hollustuhætti og mengunarvarnir

15. gr.

*Staðfesting og gildistaka.*

Samþykkt þessi staðfestist hér með skv. 2. mgr. 59. gr. laga nr. 7/1998 um hollustuhætti og mengunarvarnir og öðlast þegar gildi.

*Umhverfis- og auðlindaráðuneytinu, 17. janúar 2019.*

*F.h.r.*

*Bláinn Rósa Þjófdeitti*  
*Sigurðis Sæmundsdóttir*

